

In Nomine Domini, Amen.

M. SIMON STANISLAUS MAKOWSKI,
SACRÆ THEOLOGIÆ DOCTOR, ET PROFESSOR,
Collega Major, Ecclesiæ Collegiatæ S. Floriani Custos, Cancellarius Lanciciensis,
Curatus Nasiechouicensis, Contubernij Hierosolymitani Prouisor, S. R. M. Secretarius,
Almæ Vniuersitatis Cracouiensis
GENERALIS RECTOR.



Academicorum regimen Sceptrorum, non plus honoris, quàm oneris inuoluens, continuam Rectoralem curam, sollicitudinem, & diligentiam, immò dies noctesq; insomnes poscit, vt tam bono publico plenè provideatur, quàm vt nondum sedati, Studiosæ Iuuentutis animi, in modestia debita ac decenti contineantur. Nec vllum profectò tam arduum in quauis Politia munus, quàm teneras mentes, ad maturam frugem deducere, hic labor! hoc opus! Sentimus quippè non minùs molestam, quàm onerosam molem hanc humeris nostris incumbentem, cum toties concordibus Literariorum Ordinum votis, admoti simus Sceptris Academicis; promptè nihilominus Deo & Reipublicæ morem gerentes, Atlantis officium gloriose exequi nitimur: vtq; conatus noster non minus felicior, quàm efficacior eueniat, Vniuersos & Singulos Jurisdictioni Nostræ Rectorali consignatos, & subiectos, paternè exhortamur, vt in timore Dei, pietate, omniq; virtutum genere, ac in studijs honestissimis, tam se, quàm alios suæ curæ commissos, seriò ac sedulò exercent, strictam Deo reddituri rationem de tempore, & munere suo, Monemus præcipuè Scholarum & Contuberniorum Seniores, vt neminem propriâ authoritate audeant recipere ad Scholas, & Contubernia, sub pæna priuationis Scholarum, & Contuberniorum, nisi inscriptos in Album Vniuersitatis, & Scholas Academicas frequentantes. Deinde inhibemus seuerè ne studiosi immisceant sese quouis temerario ausu tumultibus quibuscumque sub pæna proscriptionis, & realis extraditionis ad Iudicium Castrense Cracouiense. Præcauemus insuper ne DD. Ciues Cracouienses, Calimirienses, & Clepardienses, permittant, suis in domibus morari, habitare, Studiosos Nobis inscijs, sub pæna Quinquaginta aureorum, iuxta Decretum Castri Cracouiensis. Vt autem Paterna hæc admonitio, & prudens animaduersio Vniuersis sub Regimine nostro existentibus innotescat, mandamus Bedellis quantocyus eandem publicari intimariq; ne in posterum quispiam ignorantiam in excusationem delicti trahat. In quorum omnium fidem, vim, & robur, Sigillum Vniuersitatis cum subscriptione manus nostræ adhibemus. Datum in Collegio Maiori Die 25. Aprilis Anno Domini 1682.

Wed. 959.



56

